

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- उपराज्यपाल मनोज सिन्हा होरें जम्मू कश्मीर च राई-बाई ते एह्दे नै जुड़े दे क्षेत्र दे होर मते विकास लेई सरकार दे धेइयै गी फही पक्का कीता ऐ।
- मुख्यमंत्री उमर अब्दुल्ला होरें दस्सेआ ऐ जे राश्ट्रीय पन बिजली निगम नै चालू माली ब'रे लेई जम्मू कश्मीर च अपनी समाजी गतिविधिएं लेई 28 करोड़ 67 लक्ख रुपे शा बद्ध रकम बक्ख रखी ऐ।
- उपमुख्यमंत्री सुरिन्दर चौधरी होरें दस्सेआ ऐ जे 3 लक्ख 70 जहार कोला मते नोजवानें रोजगार पोर्टल पर अपने नां दर्ज कराई लैते दा ऐ।
- व्हाईट नाईट कोर दे जीओसी लैफिटनेंट जनरल नवीन सचदेवा होरें राजौरी-पुंछ सेक्टर च सुरक्षा स्थिति दा जायजा लैता।
- एतिहासक मुगल रोड गी 10 अप्रैल गी गडिडएं दी आओजाई लेई खोलेआ जाग।

<><><><><><>

LG-Krishak Mela

उपराज्यपाल मनोज सिन्हा होरें कल शेर-ए-कश्मीर एग्रीकल्चर यूनिवर्सिटी स्कास्ट दे आर.एस.पुरा कैंपस च कृषक मेला 2025 च शिरकत कीती ते उन्नत करसानें गी सम्मानत कीता। उपराज्यपाल होरें यूनिवर्सिटी परिसर च चार नमिएं सुविधाएं दा बी उद्घाटन कीता जिंदे नै शिखा, अनुसंधान ते करसानें गी सिखलाई देने दे कम्में च बेहतरी आग। इस मौके अपने संबोधनै च उपराज्यपाल होरें आखेआ जे जम्मू कश्मीर च राई-बाई ते एह्दे नै जुड़े दे होरने क्षेत्रें च पिछले किश समें दरान बड़ा मता सुधार ते बदलाव आपै करदा ऐ जेह्दा श्रेय प्रधानमंत्री नरेन्द्र मोदी हुंदे कुशल मार्ग दर्शन गी जंदा ऐ। उनें इस क्षेत्र च जम्मू कश्मीर गी होर अगड़े लेने दे सरकार दे धेइयै गी बी पक्का कीता। उनें दस्सेआ जे इस क्षेत्र दे विकास लेई असें केइं स्कीमें ते कार्यक्रमें गी लागू कीता ऐ जिंदे च इस क्षेत्र दे पूरे पराते विकास सरबन्धी कार्यक्रम एचएडीपी बी शामिल ऐ। उनें आखेआ जे पिछले त्रऊं ब'रे दरान जम्मू कश्मीर च राई-बाई ते एह्दे नै जुड़े दे होरने क्षेत्रें च रिकार्ड उत्पादन दर्ज कीता गेआ ऐ.....

<><><><><><>

CM-CSR

मुख्यमंत्री उमर अब्दुल्ला होरें कल विधानसभा गी जानकारी दित्ती ऐ जे राष्ट्रीय पन बिजली निगम एनएचपीसी नै जम्मू कश्मीर च समाज लेई 28 करोड़ 67 लख 40 ज्हार रपे बक्ख रखे दे न जिसलै कि मुख्य भरै च इस चाल्ली दिएं गतिविधिएं लेई बक्ख रखी गेदी कुल रकम 1 अरब 67 करोड़ 93 लख रपे ऐ। आकाशवाणी दे जम्मू संवाददाता नै जानकारी दित्ती ऐ जे विधायक वहीद उर रहमान परा हुंदे आस्सेआ पुट्टे गेदे इक सुआले दे परते च मुख्यमंत्री होरें अगगे दस्सेआ जे एनएचपीसी समाज लेई अपनी जिम्मेवारी तैहत सेहत, स्वच्छता, शिक्षा, हुनर विकास, खेड्डें, ग्रामीण विकास ते आपदा प्रबंधन दे क्षेत्रे च गतिविधिएं दा सरिस्ता करदा ऐ। इक होर जिमनी सुआल दे परते च मुख्यमंत्री होरें बपार कारोबार कन्नै जुड़े दे इदारे आस्सेआ समाज प्रति अपनी जिम्मेवारी आली गतिविधिएं गी तोडघ चाढ़दे'लै सरबंधत विधायक कन्नै संपर्क करने पर जोर दित्ता।

<><><><><><>

Dy. CM-Unemployment

उपमुख्यमंत्री सुरिन्दर चौधरी होरें दस्सेआ ऐ जे 2025 दे जनवरी महीने दी खीरे तोड़ी 3 लख 70 ज्हार 81 बेरोजगार नोजवानें अपना नां रोजगार पोर्टल पर दर्ज करोआई लेते न जिंदे चा 2 लख 40 ज्हार 502 मर्दे ते 1 लख 30 ज्हार 309 महिला न। आकाशवाणी दे जम्मू संवाददाता नै जानकारी दित्तर ऐ जे विधायक अली मोहम्मद सागर हुंदे आस्सेआ पुच्छे गेदे इक सुआले दा परता दिंदे होई उपमुख्यमंत्री होरें दस्सेआ जे पढ़े लिखे दे बेरोजगार नोजवानें दे नां दर्ज करने दी प्रक्रिया तैहत कम्म रोजगार हासल करने दी इच्छेआ रखने आले नोजवान अपनी मर्जी कन्नै नां दर्ज कराई सकदे न जेहदे नै उंदी बक्ख स्वरोजगार स्कीमें तगर पुज्ज जमीनी बनी सकदी ऐ। उनें दस्सेआ जे 2 फरवरी 2025 तगर 5 लख 58 ज्हार 870 उद्यमिं दा मिशन युवा तैहत सर्वेक्षण कीता गेआ ऐ।

<><><><><><>

Free Gas Cylinders

सरकारै आखेआ ऐ जे जम्मू कश्मीर दे लोकें गी 12 गैस सिलेंडर दे मुफ्त देने दे प्रस्ताह उप्पर अजें बचार बमर्श कीता जा'रदा ऐ। आकाशवाणी जम्मू संवाददाता नै जानकारी दित्ती जे एमएलए सज्जादगनी लोन हुंदे आस्सेआ पुच्छे गेदे सुआले दा लिखित च नरता दिंदे होई खुराक, नागरिक, आपूर्ति ते उपभोक्ता मामले दे मंत्री समीश शर्मा होरें विधानसभा च जानकारी दित्ती इस बारे बचार बमर्श अजें जारी ऐ ते सरकासर आस्सेआ अपनी वचनबद्धता ते वायदे गी पूरा करने लेई सबै जतन कीते जा'रदे न। लोन होरें सुआल पुच्छेआ हा जे क्या सरकार लोकें गी 12 गैस सिलेंडर मुफ्त देने दी मंछा रखदी ऐ ते जेकर हां ते एहदी अमलावरी दी केह समें सीमा ऐ।

<><><><><><>

Sanasar Tulip Garden

बांदी ब्हारेंच सनासर तुलिप गार्डन गी अप्रैल म्हीने दे पैहले हफ्ते च खोली दित्ते जाने दी मेद ऐ। हालांके श्रीनगर आला तुलिप गार्डन कल्लै कोला खुल्ला'रदा ऐ। जम्मू खित्ते च मशहूर सैलानी थाहर सनासर आला तुलिप गार्डन श्रीनगर आले तुलिप गार्डन दी तर्ज पर गै बनाया गेदा ऐ। हर ब'रे इत्थें तुलिप दे बल्ब राए जंदे न ते इंदी गिनतरी हर ब'रे बधदी जा'रदी ऐ। जानकारी देआ'रदे न उधमपुर थमां साढ़े जिला संवाददाता अचिन दूबे.....

<><><><><><>

GOC Visit

व्हाईट नाईट कोर दे जीओसी लैफ्टिनेंट जनरल नवीन सचदेवा होरें काउंटर इन.....फोर्स(रोमियो) ऐ जीओसी ते एस ऑफ स्पेड्स डिवीजन दे जीओसी सनें डेल्टा फोर्स दे जीओसी हुंदे कन्नै राजौरी-पुंछ सेक्टर दा दौरा लाया तां जे खित्ते दे सुरक्षा हालात बारे जायजा लैता जाई सकै। आकाशवाणी दे जम्मू संवाददाता नै जानकारी दित्तर ऐ जे जीओसी होरें सुरक्षाबलें दी मुश्कल हालात च पूरी रमानदारी कन्नै कम्म करने लेई सराहना कीती ते इस्सै चाल्ली हर मुश्कल दा सामना करने लेई उंदा दिल बघाया। जीओसी होरें इस दरान मजूदा सुरक्षा स्थिति दे कन्नो कन्नी हर चाल्ली दी स्थिति थमां निबड़ने बलें दी तैआरी ते होरनी चीजें दी बी समीक्षा कीती।

<><><><><><>

Mughal Road

जम्मू दे राजौरी ते पुंछ जिले गी कश्मीर दे शौपियां जिले कन्नै जोड़ने आली ऐतिहासक मुगल रोड गड्डिङ दी आओजाई लेई 10 अप्रैल गी खोली जाग। आकाशवाणी दे जम्मू संवाददाता नै जानकारी दित्ती ऐ जे अधिकारिणं दा आखना ऐ जे अगले म्हीने दी 10 तरीक गी इसी गड्डिङ दी आओजाई लेई खोलेआ जाग पर ओह्दे कोला पैहले 9 तरीक गी इक ट्रायल रन कीता जाग। पुंछ दे डिप्टी कमीशनर होरें आखेआ जे मौसम साफ रौहग ते इक बक्खी दा आओजाई आला एह ट्रायल रन 9 तरीक गी होग। उनें आखेआ जे मौसम विभाग नै 29 मार्च गी बर्फबारी दी पेशगोई कीती दी ऐ, पर जेकर मौसम खुशक रौहदा ऐ ते बर्फबारी नेई होंदी ऐ ते ट्रायल रन कराने लेई 30 मार्च गी शिड़कें गी साफ करने दा कम्म शुरू कीता जाग। मुगल रोड जनवरी म्हीने भारी बर्फबारी कारण बंद करी दित्ती गेई ही। इस बारे होर मती जानकारी देआ'रदे न पुंछ दे डीसी विकास कुंडल होर.....

<><><><><><>

Ramban Ayush

रामबन दे आयूष मैहकमे आस्सेआ लोकें गी आम बमारिएं ते इंदे कोला बचाह लेई उपाएं बारे जागरूकता फैलाई जा'रदी ऐ। एहदे लेई आयूष मैहकमा रामबन च समें—समें पर मैडिकल जांच ते जागरूकता कैपें दा सरिस्ता करदा ऐ तां जे लोकें दी शूगर ते बी.पी बगैरा दी जांच कीती जाई सकै। एहदे अलावा आयूष मैहकमा एएमटी स्कूलें च यानि आयूष प्रबंधन स्कूलें च दुआइएं दे फार्मसी सरबंधी सिखलाई कोर्स उपलब्ध करा'रदा ऐ। एह पैहलकदमी आयूष पैरामैडिकल अमले दी कमी गी दिखदे होई मैहकमे आस्सेआ पुट्टी গেई ऐ। इस बारे होर मती जानकारी दिंदे होई वरिष्ठ मैडिकल अफसर ते कजला योग कोआर्डिनेटर डॉ. मसूद इकबाल जरगर होरें आखेआ.....

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम च “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800—11—7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>